

大方便佛報恩經

卷七

百八十九
器七

48658



元祿九年丙子二月日重脩

皇圖 聖業 固 帝 階 級 昌

佛 日 增 輝 懋 輪 常 轉

山城州天安寺法金剛院置

大方便佛報恩經卷第七

失譯

親近品第九

復次菩薩摩訶薩知恩報恩修大方便利益
衆生應適隨宜顯示無方善男子有佛出世
号無畏王如來應供正遍知明行足善逝世
間解無上士調御丈夫天人師佛世尊應現
世間引接有緣有緣既盡遷神涅槃滅度之
後於正法中有一婆羅門子聰明黠慧受持
五戒護持正法婆羅門子緣事他行遠至餘
國到於中路多諸賊難有五百人共爲徒侶
前至嶮路於頓止處五百群賊常住其中前

後圍遶欲劫行伴。尔時賊主密遣一人歷伺諸伴。應時欲發。尔時賊中復有一人先與是婆羅門子親善。知識以親善故。先來告語善男子。當知於初夜時。當有賊發。當時憤鬧。恐相傷損。故相告語。汝密自作方便。遠捨而去。勿令伴知。尔時婆羅門子聞此語已。辟如人噎。既不得咽。又不得吐。欲告諸伴。懼畏諸伴害此一人。若害此人。懼畏諸伴。沒三惡道。受無量苦。若默然者。賊當害伴。若殺諸伴。賊墮三惡道。受無量苦。作是念已。我當設大方便。利益衆生。不自爲己。三惡道苦。是我所宜思。惟是已。即便持刀。斷此賊命。使諸同伴安隱。

無為尔時衆伴異口同音而作是言大婆羅
門子卿是勝人亦是純善之人去何今日作
此大惡尔時婆羅門子胡跪合掌心生慙愧
而我今日不應作惡為利衆生及諸同伴尔
時衆伴復作是言汝自殺人於我何益若衆
人言此是惡賊欲謀害衆伴為衆伴故斷此
人命令伴安隱還家而我罪報甘受地獄苦
尔時五百伴人舉聲大哭悲喜交集而作是
言天下所重無過於命所畏無過於死所以
然者一切衆生皆捨金銀珍寶國城妻子衣
服飲食為救身命我等衆伴便為更生作是
語已此婆羅門子為衆生故不辭衆苦及三

惡報我等今日當念重恩報重恩者今當速
發阿耨多羅三藐三菩提心作是語已即令
發心尔時五百群賊復作是言卿是勝人純
善之人云何乃能作是大惡婆羅門子言我
誠不應作是大惡爲欲利益一切衆生并護
汝等身命故尔時群賊而作是言卿自殺人
於我何益時婆羅門子報諸賊言我先知汝
等在此但我默然不告諸國王及我諸伴以
是故令汝等身命安隱尔時諸賊聞是語已
而作是念我等身命便爲更生即前合掌向
是童子善哉大士修大悲者願勅我等何所
作爲荅曰我所作者唯當速發無上菩提之

心。爾時諸賊爲報恩故尋聲即發。阿耨多羅三藐三菩提心。佛告阿難。善菩薩勤求精進。欲莊嚴菩提。欲報佛恩。常當憶念一切衆生。如一子想。善男子。當知。爾時婆羅門子。豈異人乎。則我身是以是因緣。超越九劫。疾成阿耨多羅三藐三菩提。復次菩薩修大方便。知恩報恩。佛在竹園精舍。有一比丘。身患惡瘡。形體周帀。膿血常流。衆所惡賤。無人親近。住在邊外朽壞房中。

爾時如來即示神力。隱蔽大衆。令無知者。如來獨往。病比丘所隨。其所須取水洗之。思惟是已。令欲界一切諸天知之。釋提桓因與諸

眷屬無量百千前後圍遶雨衆天花作種種
天樂住虛空中。爾時忉利天王手持百福莊
嚴微妙澡灌盛滿清淨大悲淨水即前奉迎
頭面禮如來足却住一面。

爾時如來即伸百福莊嚴臂即於纖長五指
放大光明遠照諸天大衆已集如來躬往病
比丘所即放頂光照病比丘比丘遇光苦痛
即除於膿血中而起歸命稽首而形不隨如
來即以右手從天帝釋受取寶瓶灌病比丘
頂左手摩拭病比丘身身諸瘡病隨如來手
尋得平復得平復已歡喜無量南無釋迦牟
尼南無大慈悲父南無無上最勝醫王而我

今日身病除愈唯有心病如來今者為憐愍
故施我法藥除我身心所有重患尔時如來
告病比丘如來今者念汝重恩如來今者欲
報汝恩尔時病比丘驚喜無量佛時即為示
教利喜比丘歡喜即得阿羅漢果三明六通
具八解脫釋提桓因及諸眷屬無量諸天皆
墮疑網如來去何枉屈神德洗病比丘瘡痍
膿血去言報恩其事去何願為我等分別解
說佛告釋提桓因及諸天大眾汝等善聽當
為汝說宿世之事釋提桓因乃往過去無量
阿僧祇劫尔時有王惡逆無道非理墜伏逼
奪取財尔時惡王與一伍百深心相知密共

要言若當有人犯官事者汝當告治威恩隨
汝若得財賄與我共之今時伍百常行鞭杖
得財多者便令不著若無財者或致失命以
此爲常時有優婆塞犯小官事將付伍百應
受鞭楚聞是優婆塞是好善人便令無著於
楚毒中而得脫難以是因緣歡喜無量憍尸

迦當知今時伍百者今病比丘是優婆塞者
今我身是是故菩薩於無量阿僧祇劫輕恩
重報乃至正覺心常不忘今時釋提桓因及
無量天衆歡喜無量有四萬八千諸天發阿
耨多羅三藐三菩提心發菩提心已作天伎
樂各還所止佛告阿難若有善男子善女人

知恩報恩當行四事一者親近善友二者至
心聽法三者思惟其義四者如說修行復有
四法一者隨法不隨人二者隨義不隨字三
者隨智不隨識四者隨了義經不隨不了義
經行此八法名爲知恩復行八法是名報恩
何等爲八一者利二者衰三者毀四者譽五
者稱六者譏七者苦八者樂復行四事是名
知恩亦名報恩一者見惡衆生心生憐愍以
修慈因緣故二者見苦衆生日不暫捨起悲
因緣故三者見師長父母有德之人心情歡
悅起喜因緣故四者見怨家衆生心不瞋恚
修捨因緣故

尔時阿難即整衣服前白佛言世尊如來初發菩提心時知恩報恩行初四事其義云何佛告阿難乃往過去無量阿僧祇劫尔時有佛出世名毗婆尸如來應供正遍知明行足善逝世間解無上士調御丈夫天人師佛世尊出興于世教導有緣已盡遷神涅槃正法像法滅已有國名波羅柰人民熾盛國土豐熟其王常以正法治國不枉人民其國有山名仙聖山其山常有五百辟支佛止住其中多有五通神仙亦住其中尔時多有諸禽獸等而來依附有一師子名曰堅誓身毛金色有大威武力敵於千發聲哮吼飛鳥墮

落走獸隱伏遊行山澤見一辟支佛沙門威
儀清淨見已心喜日日親近常聞誦經說微
妙法亦時有大獵師見是師子身毛金色心
生歡喜而作是念我若得此師子剥取其皮
奉上國王必施爵祿七世無乏思惟是已復
發是言堅誓師子獸中之王弓箭所不及撻
網所不制我今復當更設異計堅誓師子所
敬望者逐是沙門我今當作沙門之像密弓
射之袈裟覆上細視徐行往詣樹下彼若見
我必來親附以親近已便復挽弓藥箭射之
萬無不獲思惟是已即便還家而唱是言祖
先已來歷世相承常爲獵師未曾聞獸身毛

金色况復見之今欲獵取即剃鬚髮而被法服如所思惟還入山中上一樹下尔時堅誓師子見是比丘心生歡喜騰躍親附舐比丘足尔時獵師即便射之既被毒箭嗟喋哮吼欲前搏撮臨欲毀害復作是念此是沙門被壞色衣是三世佛賢聖標式我今若害不足為難若奪其命便奪諸佛賢聖標相思惟是已飲氣忍苦復經少時毒藥轉深苦痛難忍思惟是已復欲博啣復發是言不足為難若毀害者諸佛賢聖之所呵責有復世間善惡不別此是惡人懷毒陰謀欲來害我我若不忍起亦惡人則無有異修忍之人一切愛敬

不忍一人衆所憎惡增長煩惱長煩惱故生
死增長長生死故生諸難處生難處故遠離
善友遠善友故不聞正法不聞正法故重繫
疑網以疑網故遠離阿耨多羅三藐三菩提
是故我今不應起惡作是念已即說偈言
願自喪身命 終不起惡心 向於壞色服

願自喪身命 終不起惡心 向於出家人
說是偈已即便命終天地六反震動驚諸禽
獸四散馳走無雲雨血日無精光尔時獵師
即脫被服持刀剥之擔負還歸既至家已奉
上國王王見歡喜問諸臣言我從生來未聞
畜獸身毛金色如何今日親自眼見奇哉恠

哉徐問獵師以何方便而得是皮尔時獵師
即前白王唯願大王賜我無畏當以上事向
大王說王言隨汝所願尔時獵師具以上事
向大王說王聞是語心生憂惱辟如人噎復
不得咽又不得吐即出宣令一切大臣及諸
小王大衆已集即自宣言諸君當知我曾從
智者聞如是語若有畜獸身毛金色必是菩
薩若一衆生發菩提心令一切衆生得大利
益如何今日是惡獵師設是方便殺是菩薩
我今若以官爵俸祿象馬七珍衣服飲食錢
財穀帛賜是惡人則與彼一道共為勞侶思
惟是已即取獵師奪其命根持師子皮還入

山中到屍骸所即以牛頭栴檀聚而成積火
闍維之師子皮骨收取舍利起塔供養佛告
阿難諸善男子堅誓師子者今則我身釋迦
文是菩薩如是親近善友乃至喪命終不起
惡何以故為知恩報恩故所以者何菩薩得
近善知識故能速成辦阿耨多羅三藐三菩
提善男子菩薩常勤求善知識為聞佛法乃
至一句一偈一義三界煩惱皆悉萎悴菩薩
至心求佛語時得法情重不惜身命設踐熱
鐵猛火之地不以為患菩薩為一偈故尚不
惜命況十二部經為一偈故尚不惜命況餘
財物聞法利故身得安樂深生信心直心正

見見說法者如見父母心無憍慢爲衆生故
至心聽法不爲利養爲衆生故不爲自利爲
正法故不畏王難飢渴寒熱虎狼惡獸盜賊
等事先自調伏煩惱諸根然後聽法非時不
聽至心聽法恭敬說者尊重於法是名菩薩
知恩報恩云何菩薩至心聽法聽法有四一
者至心二者一心三者一切心四者善心是
名菩薩勤求十二部經所以者何念佛重恩
爲欲流布諸佛正法爲欲增長諸佛法故爲
令世間信佛法故爲令一切無量衆生悉得
無上菩提道故是故菩薩念十方無量諸衆
生故爲報諸佛重恩故是故菩薩所以勤求

十二部經菩薩何故勤求佛法故欲令衆生
生信心故是故求於因論爲知諸過罪故爲
破外道惡邪論故爲知方便調衆生故爲欲
分別如來語義世語義故是故菩薩求於因
論菩薩何故求於聲論爲令言辭淨莊嚴故
不淨之言不能宣說明了義故爲欲解知一
切義故不壞正語憍慢心故破於邪見爲知
方便調衆生故是故菩薩求於聲論菩薩何
故求諸醫方爲令衆生離諸惡不善四百四
病故爲憐愍一切衆生爲令生信心故旣得
離患心生歡喜故以得歡喜心常念諸佛大
悲度衆生故是故菩薩求諸醫方菩薩何故

求世方術爲易得財利衆生故爲衆生生信心故爲知世事破憍慢故調伏衆生故破一切法相諸暗障故若有菩薩不能如是求五事者終不能得阿耨多羅三藐三菩提成一切智爲得無上菩提故求於五事菩薩知恩報恩者爲衆生說說何事云何說說何事謂十二部經云何說成就五事爲得阿耨多羅三藐三菩提故說有二事一者次第說二者清淨說次第說者初說檀波羅蜜次說尸波羅蜜乃至般若波羅蜜爲知恩報恩故思惟其義如法而住是名次次第說清淨說者聽者坐說者立不應爲說若聽者求於法過求說

者過不應爲說若聽者依人不依法不依法者不應爲說若聽者依字不依義不應爲說乃至聽者不依了義經者不應爲說何以故是人不能恭敬諸佛菩薩清淨法故若說者尊重於法聽法之人亦生崇敬至心聽受不生輕慢是名清淨說法次第說者一切說一切說者謂十二部經乃至一句一偈乃至半偈若辭若義若法於其法義示教利喜時或時呵責或時直說或時喻說隨所應說或淺近說或易入說隨所樂聞是名菩薩知恩報恩次第說法清淨說者菩薩摩訶薩於怨憎中修習慈心得慈心已於惡衆生及放逸人

以諸方便而爲說法乃至愛樂其心憍恣及
貧窮人方便開示而爲說法不爲讚已毀他
飲食利養名譽故是名菩薩知恩報恩清淨
說法云何如法住身口意業修習善法具足
清淨知恩報恩爲莊嚴阿耨多羅三藐三菩
提故復次菩薩摩訶薩知恩報恩思惟其義
多聞逮得揔持熾然法炬爲利益一切衆生
應當修施戒多聞供養說者不求法過及說
者過無有害心施衆無畏是名知恩受人天
樂得道涅槃是名報恩菩薩復有四事修於
忍辱破壞不忍莊嚴菩提攝取衆生令修忍
辱若自忍若使他忍遠離怖畏是名知恩以

忍辱因緣無有瞋心眷屬不壞不受苦惱心
無悔恨捨是身已受人天樂得涅槃樂是名
報恩善男子菩薩復有四事勤修精進破壞
懈怠莊嚴菩提攝取衆生爲菩提道令修精
進卧安覺安離諸煩惱增長善法身受安樂
是名自利菩薩精進不惱衆生打擲呵責是
名利他捨是身已受人天樂身得大安獲菩
提道是名大果是名菩薩精進四事菩薩修
定破壞亂心莊嚴菩提攝取衆生爲菩提道
令修禪定現受世樂身心寂靜是名知恩以
身心寂靜故不惱衆生是名知恩報恩菩薩
捨是身已受清淨身安隱快樂得大涅槃是

名菩薩禪定四事復次菩薩知恩報恩成就
智慧破壞無明莊嚴菩提以四攝法攝取衆
生爲菩提道修行智慧以知法界故受身安
樂是名自利能發衆生世間之事及出世事
是名利他能壞煩惱智慧二障是名大果是
名知恩是名報恩菩薩智慧四事不可思議
復次菩薩以宿命智知宿世事爲觀衆生善
惡諸業同受善者爲欲利益一切衆生故菩
薩摩訶薩以大方便處兜率天成就壽命有
三事勝一者壽勝二者色勝三者名稱勝初
下之時放大光明遍照十方自知始入母胞
胎時住時出時於十方面行七步時無人扶

持作如是言我今此身是最後邊諸天鬼神
軋闍婆阿脩羅迦樓羅緊那羅摩睺羅伽以
諸華香微妙伎樂幡蓋供養三十二相莊嚴
其身無能勝者以慈善力壞魔兵衆一一支
節同那羅延所得大力童齒之年不學世事
而能知之無師而學自然而得阿耨多羅三
藐三菩提梵天勸請爲諸衆生轉正法輪正
受三昧雷聲震吼不能令動諸獸親附愛如
父母畜生奉食佛知心故靈神降雨洗浴其
身樹垂曲枝蔭翳其軀旣成道已六年之中
魔常伺求不得其短常在禪定成就六念心
善能了知覺觀起滅是名菩薩共生不可思

議不共生者爲欲利益一切衆生如彼狂人
緣見如來還得本心盲者得眼倒產得順聾
者得聽貪瞋癡者悉得除滅是名不共生不
可思議又共生者如來所行不可思議常右
脇卧如師子王若草若葉無有動亂旋籃猛
風不動衣服發足行步如師子玉白鵝王等
若欲行時先發右足所行之處高下皆平食
無完過遺粒在口是名共生不可思議復次
共生不可思議一者足下平二者足下千輻
輪三者拍纖長四者足跟臍滿五者拍網縵
六者手足柔輒七者臍踣腸如伊尼延鹿王
八者踝骨不現九者平住手摩於膝十者陰

藏相如象馬王十一者身圓滿足如屋拘陀
樹十二者身毛上靡十三者一一毛右旋十
四者身真金色十五者常光各一尋十六者
皮膚細軟塵垢不著十七者七處滿十八者
上身如師子十九者臂肘臄圓二十者缺骨
平滿二十一者得身臄相二十二者口四十
齒二十三者齒密不踈現而齊平二十四者
齒色白二十五者頰車方如師子二十六者
味中得上味二十七者肉髻相二十八者廣
長舌二十九者梵音聲三十者目紺青色三
十一者眼如牛王三十二者眉間白毫如是
八十種不可思議相好一一相好復有無量

百千種微妙相好一一相好皆是菩薩從初發心堅固菩提知恩報恩修是妙行是故今得無上菩提

佛言如來久於無量阿僧祇劫至心修持淨戒故得足下平供養父母和尚師長有德之人以是因緣得足下輪相於諸衆生不生害心無劫盜想若見父母和尚師長有德之人遠出奉迎安施床座恭敬禮拜破除憍慢以是因緣得纖長拍具上三行得足跟臍滿以四攝法攝取衆生以是因緣得拍網縵以好酥油摩洗父母和尚師長有德之人以是因緣得手足柔軟修習善法不知厭足以是因

緣得臃腫腸聞法歡喜樂爲人說爲法走使
以是因緣得踝骨不現相三業清淨瞻病施
藥破除憍慢飲食知足以是因緣得平立手
摩膝相見分離者善言和合自修慙愧亦教
人修以是因緣得馬藏相自淨三業亦教人
淨若有衆生四大不調能爲療治以是因緣
得身圓相聞法歡喜樂爲人說以是因緣得
身毛上靡相思惟諸法甚深之義樂修善法
供養父母和尚師長有德之人若行道路佛
塔僧坊除去埽石荆棘不淨以是因緣得一
一毛右旋相若以飲食瓔珞施人除去瞋心
以是因緣獲得二相一者金色二者常光以

何業緣得一毛相即此業緣得身細軟塵
垢不著常施衆生所須之物以是因緣得七
處滿相自破憍慢調柔其性隨衆生心如法
而行爲除不善教以善法以是因緣得上身
如師子相得臂肘臄圓缺骨平滿相以何業
緣得纖指相即此業緣得身臄相遠離兩舌
和合鬪諍以是因緣得四十齒相齒密不踈
相齒齊平相修欲界慈以是因緣得白齒相
見有求者歡喜迎送以是因緣得方頰車相
等視衆生猶如一子以是因緣得上味相常
施衆生無上法味見有忘者施其憶念自持
五戒轉以教人修集慈心能大法施以是因

緣得肉髻相廣長舌相實語法喜語法軟語
非時不語以是因緣得梵音聲相修集悲心
視諸衆生猶如父母以是因緣獲得二相一
者目紺青色二者眼如牛王見有德者稱實
讚歎以是因緣得白毫相三十二相雖復各
各說其因緣真因緣者持戒精進何以故若
不持戒能修精進尚不得人身況得三十二
相無見頂及肉髻相等無差別復次凡所作
事定心不悔以是因緣得足下平相若至
心作以是因緣得千輻輪相第二第三指網
縵相七處滿相細軟肩圓缺滿身直廣長舌
相若常作者以是因緣得長指相平任摩膝

常光一尋相齒密不踈相苦淨作者以是因
緣獲得餘相復次若於衆生生淳善心以是
因緣得手足柔輒膚體細滑塵垢不著次第
修集時節修集以是因緣得第二第三第四
相喜修善法心無悔退以是因緣得金色身
常光齒白眉間毫相若聞讚歎不生憍慢覆
藏善法不令人知以是因緣得馬藏相所修
善法迴向菩提以是因緣得一孔一毛相
身毛上靡口四十齒最上味相勤精進故以
是因緣得方頬車上身如師子相至心愛念
一切衆生如視一子以是因緣得齒齊平紺
青目如牛王眼相修集善法不知厭足以是

因緣獲得餘相菩薩摩訶薩任性行時修三十二相業任淨行時雖有如是三十二相相不具足未得明淨任十三行亦乃了了明顯具足一切佛法雖無量相衆生不同有上中下不可思議是故佛說三十二相一切衆生所有功德和合集聚正與如來一毛相等一切毛孔所有功德和合集聚乃成一好合集衆好所有功德增至百倍乃成一相唯除白毫無見頂相合集其餘一切諸相增至千倍成是二相和合集聚三十二相八十種好所有功德增至千萬億倍乃成如來深遠雷音其聲聞于無量無邊不可思議微塵等諸佛

世界為衆生故行大慈悲知恩報恩修集此
不可思議甚深微妙不可思議如是相好一
一相能利益無量百千萬億大地微塵等衆
生令發菩提心次第修集具足得成三十二
相好具相好已悉令往趣菩提樹下降魔成
佛轉正法輪利益衆生度渴愛海到大智岸
成就利益一切衆生佛告阿難一切大衆諸
菩薩摩訶薩等諸善男子汝等誰能常念佛
恩護持正法書寫讀誦微妙甚深大方便佛
報恩經典誰能於後惡世建大精進受持擁
護阿耨多羅三藐三菩提誰能護法流布此
經於一切衆生作無邊利益尔時大會中有

萬八千大菩薩摩訶薩即從座起整衣服偏袒右肩右膝著地叉手長跪而白佛言世尊我等能於後惡世之中受持擁護阿耨多羅三藐三菩提能護正法教化衆生今時師子菩薩復作是言世尊我亦能以種種方便攝持衆生金剛菩薩言世尊若有衆生當墮正惡道我能遮持令不墮落文殊師利復作是言世尊若有衆生凡所求索我悉能令一切具足智幢菩薩復作是言我能惠施衆生大智法幢菩薩復作是言世尊我能以法普施衆生日光菩薩言世尊我願施於衆生安樂月光菩薩言世尊我能教化一切衆生令修

福德善護菩薩言世尊我能教化一切衆生
令不放逸無盡意菩薩言世尊我能教化一
切衆生悉令見無盡界義月上菩薩言世尊
我能惠施一切衆生無上安樂如是等諸菩
薩各自立竒特妙願莊嚴菩提利益一切衆
生為念佛恩為報佛恩故即從座起胡跪合
掌而白佛言願以此經付囑我等諸菩薩衆
阿難白佛言世尊云何名此經云何奉行佛
告阿難此經名攝衆善本亦名大方便亦名
微密行亦名佛報恩佛告阿難及諸大菩薩
摩訶薩衆汝等當如說修行說是囑累品時
七萬二千聲聞發無上菩提之心及餘一切

